

Editorial

Et ass erëm esou wäit a mir si frou lech, léif Frënn vun der Fondatioun vun de Lëtzebuurger Guiden a Scouten, e klenge Réck- an Ausbléck iwwert dat ganz villfältegt Schaffe bei den LGS ze ginn.

Den absoluten Highlight vum vergaange Guiden a Scoutsjoer war sécherlech de **GolUrban**, mat puer dausend zousätzlechen Awunner um Kierchbierg an der Stad Lëtzebuerg. Et huet ee praktesch nëmme positiv Echoen héieren, vun de Kanner a Jugendleche mat hire Cheffen aus dem Inland an Ausland, esou wéi och vun deene ville Visiteuren, déi de Camp besicht hunn.

D'LGS hunn alt erëm eng Kéier bewisen, dass si am Organiséiere vun engem esou groussen Event einfach topp sinn. Dem Staff an alle benevole Mataarbechter ee ganz grouse Merci vun dëser Plaz gesot.

Iwwert d'Fondatioun konnten 11.690€ gesammelt ginn, déi un de GoSupport konnten iwwerwise ginn, wouduerch Scouten aus Partnerlänner um Camp konnten deel huelen.

Den Ufank vum neie Guiden- a Scoutsjoer stoung ganz am Zeeche vun engem Wiessel un der Spëtzt vun



Members vum Verwaltungsrot vun der Fondatioun

President Beissel Gilbert **Vize-President** Metz Georges

Tresorier Seiler Patrick **Sekretär** Bisdorff Sylvie

Members Péporté Théo, Elvinger Pierre, Folschette Nancy, Picard Martine, Weis Christian, Anouk Galassi, Yves Marchi

Newseletter

Dezember 2017

eisem Verband. Déi éischte Kéier an der Geschicht vum Verband haten sech zwee "Teams" zur Wal gestellt. **D'Anouk Galassi**, als Commissaire générale, an den Yves Marchi, als Commissaire général adjoint kruten d'Vetrauen vum Verbandskongress geschenkt a wäerten elo d'Geschécker vum Verband an den nächsten 3 Joer leeden. Hinnen an allen Memberen aus dem Verbandscomité sief alles Guddes an hirem Schaffen gewënscht.

E grouse Merci geet awer och un **d'Misch Meyer** an de **Fränz Duhr** fir hiert Engagement während deene leschten 3 Joren.

Et ass flott ze gesinn, dass ëmmer erëm jonk Leit sech engagéiere fir an dem formidabele Mouvement vun de Guiden a Scouten fir eis Jugend do ze sinn.


Mam Benevolat eleng geet et awer net duer. Mir si frou, dass de Ministère eis duerch eng Konventioun ënnerstëtzt, wouduerch mëttlerweil 9 Mataarbechter kënnen am Beräich Sekretariat, Finanzen an Administrativem, Formatioun, Programm, technesche Service a Jugendhaus beschäftegt ginn.

Säit dem 15. September steet dës Ekippen ënnert der Leedung vum Matthieu Schmit als neie Chargé de direction.

Elo nach vill Spaass beim Liese vun dëser Newsletter a schéi Feierdeeg gewënscht fir lech an är Familjen.

Gilbert Beissel

President



ONGD

1988 huet d'national RaRo-Ekipp den éischte Camp zu Mboro am Senegal organiséiert.

Vill Campe sinn duerno gewiescht an iwwert all déi Joren huet sech eng déif Frëndschaft tëschent de senegaleseschen an de lëtzebuergesche Guiden a Scouten entwéckelt. Zesummen ass gebaut, geschweesst a renovéiert ginn.

Zwou ënnerschiddlech Kulturen hunn sech op dësem Wee kennegeléiert. An der **Summervakanz 2018** soll dës Frëndschaft lo gefeiert ginn. Dofir organiséiert d'RaRo-Ekipp an Zesummenaarbecht mat der ONGD Guiden a Scoute fir ENG Welt e weidere Camp am Senegal.

2 Woche laang treffen sech eng ronn 50 RaRo aus dem Senegal an aus Lëtzebuerg um **CIFOP** fir zesummen als Guiden a Scouten eng eemoleg Erfahrung ze deelen. De **CIFOP** ass dee Centre de Formatioun, dee während deene Campen opgeriicht an ausgebaut ginn ass. Haut funktionéiert dës Schoul virbildlech an erméiglecht ville jonke Senegalesen eng unerkannte Berufsausbildung ze maachen.

Iwwert déi **30 Joer** hate méi wéi **200 lëtzebuergesch Guiden a Scouten** déi eemoleg Chance e Camp am Senegal mat'erliewen. Am Summer 2018 gëtt um Scoutscamp de Jubiläum gefeiert an all Anciëne sinn härerzlech invitéiert, un dëse Festivitéiten deelzehuelen.

Dat ass eng flott Geleeënheet, vill al Frënn rëmzegesinn an esou zesummen Erënnerungen opzefrëschen.

Och am Summer wäert geschafft a gebaut ginn, mee wéi op all RaRo-Camp, steet den Austausch mat anere Guiden a Scouten am Virdergrond.



2018
SUMMER



Jugendhaus Bissen

Während dem ganze Joer 2017 hu vill flott Aktivitéiten am Jugendhaus stattfonnt, wéi z.B. ee Graffiti-Workshop, d’Nuit du Sport, eng Bänk fir d’Jugendhaus ass gebaut ginn, am Summer si mir 1 Woch zesummen Zelte gaangen, vill Kachaktivitéite goufen ugebueden an nach ganz vill méi gouf de Jonken an der deeglecher Aarbecht proposéiert. D’Jugendhaus zu Bissen gëtt et zënter 10 Joer, dowéinst si mir am Gaang d’Säll ze renovéieren an nei opzedeelen.

Am Jugendhaus zu Bissen huet sech am November Verschiddenes geännert.

No 5 Joer am Jugendhaus huet de Christoph Postler sech een neie Challenge gesicht an huet eis den 31. Oktober verlooss fir op enger neier Plaz unzufänken. Mir soen dem Christoph e grouse Merci fir all déi Aarbecht, déi hien iwwert déi 5 Joer gemaach huet a wënschen him fir seng Zukunft nëmmen dat Besch.

Den 1. November huet dann och schonn de Marcial Cabrera am Jugendhaus ugefaangen.

Hien ass e motivéierten an dynamesche jonken Här, dee flott an nei Projete mat de Jugendlechen ëmsetze wäert.

D’Jugendhaus Bissen



31
2017
OKT



19/20
2018

MEE

Bealtaine

Päischtweekeend **den 19. & 20.**

Mee 2018 ass déi 8ten Editioun vum grouse Keltenfestival BEALTAINE um Neihaischen.

Dir kënnt de ganze Weekend an d’Welt vun de Kelten erasnupperen. Während zwee Deeg presentéiere mer lech **30 Ateliere** fir Kanner an Erwuessener ronderëm d’Keltenhaus, Opträtter vun iwwert 140 Keltische Gruppen, Musek, Danz an Animatioun a keltesch Spezialitéiten. Och dëst Joer ass de Festival mat Nuetsshows e Samschdeg bis 10 Auer owes op. Fir d’lessen a Gedrénks ass gesuergt, profitéiert och vun eise gratis Busnavette fir op de Bealtaine ze kommen. Weider Informatiounen fannt Dir op www.bealtaine.lu.



GoUrban 2017



Dëst Joer hunn d'LGS um Kierchberg eng Stad an der Stad erschaf, de GoUrban. Während zwou Wochen si **4.000 Guiden a Scouten** aus der ganzer Welt zesumme komm. D'Konzept vun engem nohaltegen, participativen, oppenen/visibelen a ganzheetlech/ edukative Camp ass opgaangen, wéi an enger richteger Stad ass geschafft, geléiert an seng Fräizäit verbruecht ginn. Och wann déi meescht Aktivitéiten op der Campplaz an um Kierchberg waren, sinn awer och en Hike a Visitte gemaach ginn. Um Open Day haten d'LGS zousätzlech d'Chance enge **14.000 Visiteuren de Scoutissem** méi no ze bréngen.



News aus dem Verband

Um leschte Kongress zu Dikrech si mir Anouk Galassi an den Yves Marchi als neit Team gewielt ginn. Hannert eis steet e neie staarke Verbandscomité mat deem mir déi nächst 3 Joren eis Decisioune zesumme wäerten treffen.

Fir d'Zäit vun eisem Mandat hu mir wëlles déi intern an extern Kommunikatioun ze fërderen, den Zougang zur Formation continue fir eis Cheffen ze vereinfachen an och eis „public relations“ ze pushen.

Fir eis ass et dobäi wichteg, dass mir, als Team vun de Lëtzebuerger Guiden a Scouten, fir all eis **Memberen accessibel** sinn.

Am Numm vun de Lëtzebuerger Guiden a Scouten wënsche mir lech an äre Famillje schéi Feierdeeg an e glécklecht neit Joer 2018.

Anouk an Yves



Renovatioun Géisserei

De Site vun der Géisserei ass 2007 ageweit ginn. No 10 Joer, villen a gudden Asätz, braucht eis Géisserei e verstärkten Entretien a Renovatioune, fir dass et an deenen nächste Joren esou weider ka goen. Sou kann den Haaptsätz vun den LGS weiderhin säin Zweck erfüllen am Sënn vun eise Guiden a Scouten.

Dofir hat d'Fondatioun am Juli ee Bréif erausgeschéckt fir un Är Ënnerstëtzung a Generositéit z'appelléieren. Mir soen den Donateure villmools Merci fir déi 19.605€. Sou kënne mir garantéieren, dass an der Zukunft d'LGS flott Aktivitéite op engem schéine Siège kënne plangen. Mir si grad nach dobäi eng Lëscht opzestellen, wéi eng Renovatioune am nächste Joer wäerten ëmgesat ginn, esou vill kënne mer scho soen, den Ustrach ass sécher dobäi.

Wéi Dir sécherlech wësst, si mir op Donen ugewisen. Mir wäere frou, wann Dir och dëst Joer un eis géift denken an d'Projete vun der Fondatioun géift ënnerstëtze mat engem Don op folgende Kont:

Fondatioun „Lëtzebuerger Guiden a Scouten am Dëngscht vun de Jonken“

**CCPLLULL
LU44 1111 2333 0015 0000**

Exp.: Lëtzebuerger Guiden a Scouten

Luxembourg
Port payé
P/S. 136